



basic education

Department:
Basic Education
REPUBLIC OF SOUTH AFRICA

SENIOR CERTIFICATE EXAMINATIONS/ NATIONAL SENIOR CERTIFICATE EXAMINATIONS

SISWATI LULWIMI LWASEKHAYA (HL)

LIPHEPHA LESIBILI (P2)

INKHWEKHWETI/INHLABA 2024

EMAMAKI: 80

SIKHATSI: Ema-awa la-2½

Leliphepha linemakhasi la-30.

TICONDZISO KULABAHLOLWAKO

1. Fundzisisa leticondziso ngembikwekutsi ucale kuphendvula imibuto.
2. Ungalifundzi lonkhe liphepha lemibuto. Buka lokucuketfwe ekhasini lalokucuketfwe bese ubeka luphawu kulowo nalowo mbuto lobutwe ngetincwadzi lotifundze lonyaka. Emva kwaloko, fundza leyo mibuto lenetimpawu kuphela bese ukhetsa leyo lofuna kuyiphendvula.

3. Liphepha lemibuto licuketse TIGABA LETINTSATFU:

SIGABA A:	Tinkondlo	(30)
SIGABA B:	Inoveli (25) nobe Temdzabu	(25)
SIGABA C:	Umdlalo	(25)

4. Kulindzeleke kutsi uphendvule imibuto LESIHLANU seyyonkhe:
ESIGABENI A imibuto MITSATFU, ESIGABENI B MUNYE, ESIGABENI C MUNYE ngalendlela:

SIGABA A: TINKONDLO

TINKONDLO LETIFUNDVWE EKLASINI – Phendvula imibuto ibe MIBILI.
INKONDLO LENGAKAFUNDVWA EKLASINI – Uphocelelekile kuphendvula lombuto.

SIGABA B: INOVELI/TEMDZABU

Phendvula umbuto ube MUNYE.

SIGABA C: UMDLALO

Phendvula umbuto ube MUNYE.

5. KUKHETFWA KWEMIBUTO YESIGABA B (INOVELI/TEMDZABU)
NESIGABA C (UMDLALO)

- Phendvula KUPHELA imibuto yenoveli/temdzabu loyifundzile kanye nemdlalo lowufundzile.
- Phendvula UMBUTO MUNYE LOYINDZABAMBHALO kanye NAMUNYE UMBUTO EMIBUTWENI LEMIFISHA. Nangabe ukhetse kuphendvula umbuto loyindzabambhalo ESIGABENI B, uphokelelekile kutsi uphendvule imibuto lemifisha ESIGABENI C. Uma uphendvule imibuto lemifisha ESIGABENI B, uphokelelekile kutsi uphendvule umbuto loyindzabambhalo ESIGABENI C. Sebentisa luhla lwekutikhumbuta kute usitakale.

6. BUDZE BETIMPHENDVULO

- Umbuto loyindzabambhalo etinkondlweni kufanele uwuphendvule ngemagama la-190 kuya kula-240.
- Indzabambhalo yenoveli/temdzabu nemdlalo kufanele uyiphendvule ngemagama la-340 kuya kula-390.
- Budze betimphendvulo temibuto lemifisha bufanele buhambisane nelinani lemamaki labekiwe, ungahlanhlatsi.

7. Fundzisisa kahle ticondziso letisekucaleni KWALESO NALESO SIGABA.

8. Tinombolo tetimphendvulo atihambisane naleto temibuto njengobe tinjalo ephepheni lemibuto.

9. Cala LESO NALESO SIGABA ekhasini LELISHA.

10. Siphakamiso sekulawulwa kwesikhatsi:

SIGABA A: Lokungenani emaminithi la-40

SIGABA B: Lokungenani emaminithi la-55

SIGABA C: Lokungenani emaminithi la-55

11. Bhala ngesandla lesibonakalako nalesifundzekako.

LOKUCUKETFEWE

Lelikhasi litakusita kutsi ukwati kukhetsa imibuto lofuna kuyiphendvula ngaphandle kwekufundza lonkhe liphepha lemibuto.

SIGABA A: TINKONDLO			
Tinkondlo letimisiwe: Phendvula nobe nguYIPHI imibuto LEMIBILI.			
INOMBOLO YEMBUTO	UMBUTO	EMAMAKI	LIKHASI
1. 'Make'	Umbuto loyindzabambhalo	10	6
2. 'Ngiboshiwe'	Imibuto lemifisha	10	7
3. 'Ngimi Lo'	Imibuto lemifisha	10	8
4. 'Mbhubhisi'	Imibuto lemifisha	10	9
NA			
Inkondlo lengakafundvwa eklasini: UPHOCELELEKILE kuwuphendvula lombuto.			
5. 'Selushiphile'	Imibuto lemifisha	10	10
SIGABA B: INOVELI/TEMDZABU			
INOVELI: Phendvula umbuto ube MUNYE kulamanoveli laphakanyisiwe.			
6. <i>Liphume Nebovu</i>	Umbuto loyindzabambhalo	25	12
7. <i>Liphume Nebovu</i>	Imibuto lemifisha	25	12
8. <i>Kubamba Letingelako</i>	Umbuto loyindzabambhalo	25	15
9. <i>Kubamba Letingelako</i>	Imibuto lemifisha	25	15
10. <i>Tibopho Telutsandvo</i>	Umbuto loyindzabambhalo	25	18
11. <i>Tibopho Telutsandvo</i>	Imibuto lemifisha	25	18
NOBE			
TEMDZABU: Phendvula umbuto ube MUNYE kulena yetemdzabu lephakanyisiwe.			
12. <i>Silulu SeMaswati</i>	Umbuto loyindzabambhalo	25	21
13. <i>Silulu SeMaswati</i>	Imibuto lemifisha	25	22
SIGABA C: UMDLALO			
Phendvula umbuto ube MUNYE kulemidlalo lephakanyisiwe.			
14. <i>Kutawuba Njalo</i>	Umbuto loyindzabambhalo	25	25
15. <i>Kutawuba Njalo</i>	Imibuto lemifisha	25	25
16. <i>Lami Lisiphetfo</i>	Umbuto loyindzabambhalo	25	28
17. <i>Lami Lisiphetfo</i>	Imibuto lemifisha	25	28

CAPHELA: ESIGABENI B na-C, munye umbuto lowuphendvulile kufanele ube YINDZABAMBHALO nobe IMIBUTO LEMIFISHA. Awukavumeleki kutsi uphendvule imibuto leyindzabambhalo LEMIBILI nobe imibuto lemifisha LEMIBILI.

LUHLA LWEKUTIKHUMBUTA

Lelikhasi litakusita kutsi uphendvule linani lemibuto lekungulona lekumele uliphendvule.

SIGABA	TINOMBOLO TEMIBUTO	LINANI LEMIBUTO LEPHENDVULWAKO	BEKA LUPHAWU✓
A: TINKONDLO (Tinkondlo letifundvwe eklassini)	1–4	2	
A: TINKONDLO (Inkondlo lengakafundvwa eklassini)	5	1	
B: INOVELI/TEMDZABU (Indzabambhalo nobe imibuto lemifisha)	6–13	1	
C: UMDLALO (Indzabambhalo nobe imibuto lemifisha)	14–17	1	
CAPHELA: ESIGABENI B na C, cinisekisa kutsi uphendvule MUNYE umbuto LOYINDZABAMBHALO NAMUNYE WEMIBUTO LEMIFISHA. Awukavumeleki kutsi uphendvule imibuto leyindzabambhalo LEMIBILI nobe imibuto lemifisha LEMIBILI.			

SIGABA A: TINKONDLO***TINKONDLO LETIFUNDVWE EKLASINI***

Khetsa tinkondlo tibe TIMBILI bese uphendvula ngato imibuto lelandzelako.

UMBUTO 1: UMBUTO LOYINDZABAMBHALO

Fundza lenkondlo bese uphendvula imibuto lelandzelako.

MAKE – VE Fakude

- 1 Ngilivile kahle livi lakhe,
- 2 Lipholile, lipholile,
- 3 Lipholisa tiphitsiphitsi.
- 4 Uphimisa kanye
- 5 Kuphume tonkhe tipoliyane,
- 6 Kusale kuhhusha
- 7 Lophilisak' umoya,
- 8 Siphile sonkhe sive seNkhosi.
- 9 Ngitivile tandla takhe
- 10 Tiyabotjotela, tiyaphilisa tisindzise,
- 11 Ngitive kahle ngenela ngenelisisa,
- 12 Tipholise emanceba nemancebakati,
- 13 Titsi titsambile nje,
- 14 Tibe telapha tonkhe tifo,
- 15 Lapho tihambe khona
- 16 Inyam' ihlumise kwemahlumel' ehlobo,
- 17 Kuhlume yonkh' imphil' ekhaya.
- 18 Ngitetsembile tindlebe takhe,
- 19 Ngetsembe budze bato,
- 20 Tindze tengc' umsakato wemoya,
- 21 Tiyibamba yonkh' imimoya
- 22 Itive tonkhe tikhalo
- 23 Lilalele lonkhe likhaya,
- 24 Kulalele ngisho nato tive.
- 25 Ngibong' uMdali ngawe Make,
- 26 Umuhle, unemusa nesisa
- 27 Hlala njalo Make
- 28 Ngiyawuhlala ngikwesekela njalo
- 29 Kukubi, kukuhle Make,
- 30 Wena uyohlala ungumake.

Lenkondlo lengenhla iveta ngalokusobala kutsi live lime kahle ngamake. Bhala indzabambhalo uvete tintfo letibalwe kulenkondlo letiveta kubaluleka kwamake.

Budze bemphendvulo yakho abube ngemagama la-190 kuya kula-240.

[10]

UMBUTO 2: IMIBUTO LEMIFISHA

Fundza lenkondlo bese uphendvula imibuto lelandzelako.

NGIBOSHIWE – FC Nkosi

- 1 Ngiboshwe tandla netinyawo,
- 2 **Ngivalwe** umlomo netindlebe,
- 3 Ngoba noma ngingakhuluma akuvakali,
- 4 **Ngitjelwa** ngemalungelo mihla le,
- 5 Ngifuntwe emalungelo onkhe mihla le.
- 6 Ngiboshwe kuwami umuti,
- 7 Ngiboshwe kuyami intalo,
- 8 Bami bantfwana bangibophile,
- 9 Ngisiboshwa engatini yami,
- 10 Nangijezisa kutsiwa ngiyahlukumeta.
- 11 Liyafa laNgwane sibukile,
- 12 Siyaphela sive sihlahle emehlo,
- 13 Kantsi kukhale nyonini,
- 14 Ingani lugotjwa lusemanti,
- 15 Ngitalugoba njani lijele lilemnyango,
- 16 Ngitalugoba njani umtsetfo ungibuke emehlweni,
- 17 Banemanga yini nabatsi
- 18 Libunjwa liseva?
- 19 Kutawuba ngiko nakunje?
- 20 Nangakha ngemiyalo yabogogo
- 21 Kutsiwa ngisidzala, ngigugile
- 22 Bebangekho ebusheni bami,
- 23 Bona badla busha babo,
- 24 Lobu lebabucedza ebhodloleni?
- 25 Naso sive sishona,
- 26 Nalo live libhubha,
- 27 Liyawuphatfwa bobani nakunje,
- 28 Kufa kwemndeni kufa kwemmango,
- 29 Kufa kwemmango kufa kwesive,
- 30 Nalo liphelela etandleni ngilibukile,
- 31 Ngoba vele ngiboshiwe.

- 2.1 Bunkondlo buni lobakhiwa nguletinhlavu leticindzetelwe endzimeni yekucala yalenkondlo lengenhla? Usho ngani? (2)
- 2.2 Bubitwa ngekutsini bunkondlo lobusemigceni ye-6 neye-7? Sekela imphendvulo yakho. (2)
- 2.3 Sonkondlo ubhale lenkondlo akusiphi simo? Usho ngani? (2)
- 2.4 Etinhlotjeni tetinkondlo letifundvwe kulomnyaka, hlobo luni lwenkondlo lolu? Usho ngani? (2)
- 2.5 Bhala ngemphumelelo yasonkondlo kunika lenkondlo sihloko lesiyifanele. (2)

[10]

UMBUTO 3: IMIBUTO LEMIFISHA

Fundza lenkondlo bese uphendvula imibuto lelandzelako.

NGIMI LO – FC Nkosi

- 1 Ubona mine lucobo,
- 2 Ungesabi kungibukisisa,
- 3 Ungakhophoti wente ngazutsi uyangihlonipha,
- 4 Ungatentisi uhlikhl' emehlo,
- 5 Vele ngimi yena lolomatiko,
- 6 Ngibuke angichophi angisilo lilanga
- 7 Vele ubona kahle hle.
- 8 Ingani wawutsi uyangibhidlita,
- 9 Kantsi uyangakha awuboni.
- 10 Wawungitjela latiswana emagama,
- 11 Usho nekusho angeke ngibe lutfo,
- 12 Ngangisilima lesibhunyako kuwe,
- 13 Kantsi awukabuti elangeni, uyangilola
- 14 Ngimi lo ubona kahle.
- 15 Wawungishaya, ungishayela kufa,
- 16 Kantsi uyangakha uyangipheka,
- 17 Njengeligolide liphekelwa buhle.
- 18 Lemivimbo lowanginameka yona,
- 19 Namuhla iphendvuke luj
- 20 Lengiludla lungapheli,
- 21 Ngebunandzi lobengenamkhawulo,
- 22 Impela ngimi lo,
- 23 Lamuhla ngingumuntfu ebantfwini,
- 24 Ngaletipikili lowawutibetsela
- 25 Ngenhloso yekungibhidlita.
- 26 Bacinisile nabatsi kujabula kuyantjintjana,
- 27 Ingani kusinwa kudedelwana,
- 28 Deda sesami sikhatsi,
- 29 Kutsiwa lisina muva liyabukwa,
- 30 Yivume nami ngayivuma,
- 31 Ngimi lo ubona kahle.

- 3.1 Bunkondlo buni lobuvetwa nguletinhlavu leticindzetelwe? Usho ngani? (2)
- 3.2 Kubangelwe yini kutsi sonkondlo afake loluphawu endzimeni yesibili emkhatsini wemugca we-13? Chaza. (2)
- 3.3 Yini kutsiwe kunesicedzelelamcondvo emgceni we-19 newe-20? (2)
- 3.4 Phawula ngephethini levetwa ngumugca we-28 newe-29. (2)
- 3.5 Uyavumelana yini nekutsi sonkondlo uphumelele kuveta incikitsi yalenkondlo endzimeni yekugcina? Sekela imphendvulo yakho. (2)

[10]

UMBUTO 4: IMIBUTO LEMIFISHA

Fundza lenkondlo bese uphendvula imibuto lelandzelako.

MBHUBHISI – SC Msibi

- 1 Wena **mbhubhisi** wesive
- 2 Bats' ungumashay' **abhubhise**,
- 3 Ngob' usila njengembokodv' elitjeni!
- 4 Kutawuze kube nini mbhubhisi,
- 5 Ubatfumb' ubafaka kulomnyam' umgodzi
- 6 Ngetimphiko takho letigcwele lunya?
- 7 Ufika kungaketeleli muntfu,
- 8 Ufika kujatjuliwe ngetidladla takho
- 9 Letinyonyoba ngebunono belikati,
- 10 Ufika ubhubhise ngeludvonsi lwakho
- 11 **Loluhlaba lungavakali**,
- 12 May' usitsa sekuphila mbhubhisi!
- 13 Uhlasela ngetindlela letinyenti,
- 14 Ugadla ngetikhali letingabonwa
- 15 Ngemehl' enyama uhlasel' ebumnyameni.
- 16 Ufik' ugadle kuvakale
- 17 Kulabo lesebalibele ngebucili bakho.
- 18 Kawukhetsi bala lemuntfu nawugadla,
- 19 Ugadla kulomnyama nakulomhlophe,
- 20 Ungamshiyi **lomncane nalomdzala**.
- 21 Takho tikhal' atibonakali,
- 22 Kubonakala lapho sewugadle khona.
- 23 Waze wabanelunya mbhubhisindzini!
- 24 Kulosewumngenil' ucedza litsemba lekuphila
- 25 Atibon' angati kuts' usatewuphila.
- 26 Ngobe wena sewumvakashel' ungakamenywa.
- 27 Alibale kuts' isekhon' imphilo
- 28 Ngale kwekuhlaselwa nguwe,
- 29 Kuphela nakakhona kulandzel' imiyalo
- 30 Yabodokotela labamsekela ngekwemphilo.

- 4.1 Hlobo luni lweluchumano lolwakhiwa ngulamagama lacindzetelwe endzimeni yekucala? Sekela imphendvulo yakho. (2)
- 4.2 Letinhlavu letigcanyisiwe emgceni we-11 takha buphi bunkondlo? Usho ngani? (2)
- 4.3 Ngusiphi sinongo senkhulumo lesetjentiswe emgceni we-20 walenkondlo lengenhla? Usho ngani? (2)
- 4.4 Ucondzeni sonkondlo ngemugca we-21 walenkondlo lengenhla? (2)
- 4.5 Phawula kutsi ngabe utecwayise kahle yini tetsamelilwati sonkondlo uma ufundza indzima yekugcina. (2)

[10]**NA**

INKONDLO LENGAKAFUNDVWA EKLASINI

Uphocelelekile kutsi uphendvule lombuto.

UMBUTO 5: IMIBUTO LEMIFISHA

Fundza lenkondlo bese uphendvula imibuto lelandzelako.

SELUSHIPHILE – NP Mabaso

1 Ngangikutsandza ngempela,
2 Kukuhle noma kukubi,
3 Ngikunakekela ngekutimisela.
4 Ungumbusi wenhlitiyo yami,
5 Ngitsi nangikucabanga,
6 Kuphel' ayitolo,
7 Wen' usiphephelo sami,
8 Ulibhubezi lelingivikelako,
9 Lamuhla akusenjalo,
10 SELUSHIPHILE.

11 Ematsemb' ami,
12 Ngangiwabek' esifubeni sakho,
13 Ngitsi ngakha likusasa letfu,
14 Kantsi ngikhe phasi,
15 Wena ungidvumatile,
16 Kubahlobo bakho bangasese,
17 Unikele ngelutsandvo lwami,
18 Wajabulisa timbangi tami,
19 Washaya webula,
20 Sangibhokela situnge,
21 Ngakhala toma,
22 Nobe kunjalo,
23 SELUSHIPHILE.

24 Lamuhla nangikubuka,
25 Ngikukhandza sewulite,
26 Imicabango yami ngawe,
27 Ayisafiki ndzawo,
28 Leyomfudvumalo yelutsandvo,
29 Lebeyivuts' engatini yami,
30 Seyivel' ikhweshile,
31 Kusele kuphela,
32 Iminjunju yekujabha,
33 Nenkumbulo yayitolo,
34 SELUSHIPHILE.

[Inyeti: Likhasi 14–15]

- 5.1 Sinongo sini senkhulumo lesisemgce ni we-8 walenkondlo lengenhla? (1)
- 5.2 Caphuna umugca loyimphindvwa lokulenkondlo. (1)
- 5.3 Bhala bunkondlo lobakhiwa nguletinhlavu leticindzetelwe endzimeni ye-2. (1)
- 5.4 Hlobo luni lwesifanamsindvo lesivetwe nguletinhlavu letigcanyisiwe emgce ni we-20? (1)
- 5.5 Chaza iphethini yalenkondlo lengenhla ubhekise endzimeni ye-3. (2)
- 5.6 Yini lecondvwe ngusonkondlo ngalemigca ye-24 neye-27 yalenkondlo? (2)
- 5.7 Phawula ngemoya lovetwe ngusonkondlo kulesimo labebukane naso uma abhala lenkondlo. (2)
- [10]**

SAMBA SESIGABA A: 30

SIGABA B: INOVELI/TEMDZABU

Kulesigaba kunemanoveli LAMATSATFU netemdzabu. Wena-ke khetsa ibe YINYE loyifundze lonyaka uphendvule ngayo.

CAPHELA: Khetsa emkhatsini WENDZABAMBHALO NEMIBUTO LEMIFISHA kuleyo naleyo noveli/temdzabu loyifundzile. Nangabe ukhetsa kuphendvula umbuto wendzabambhalo kulesigaba, uphokelelele kutsi ESIGABENI C uphendvule umbuto wemibuto lemifisha.

UMBUTO 6: UMBUTO LOYINDZABAMBHALO**LIPHUME NEBOVU – BB Malangwane**

LaMagagula kumfanela ngayiphi indlela kuba ngumlingisi logcamile kulenoveli? Bhala indzabambhalo uvete tigameko letiphendvula lombuto, ulandzele letihlokwana:

- Tinkinga labukene nato LaMagagula emendweni.
- Tigameko letitsintsa LaMagagula naLushawulo.
- Tigameko letitsintsa LaMagagula naTintfombi.
- Kuphumelela kwaLaMagagula etifisweni takhe.

Budze bendzabambhalo yakho abube ngemagama la-340 kuya kula-390.

[25]**UMBUTO 7: IMIBUTO LEMIFISHA****LIPHUME NEBOVU – BB Malangwane**

Fundza lethekesthi leyincenye yendzaba lesenovelini bese uphendvula imibuto lelandzelako.

ITHEKSTHI A

'Cha, mine ngisukumela kubonga nje kulona waKhumalo ngalomcondvo lomuhle kangaka latse wawucabanga. Lendlela ngiyo kanye lokwakuhanjwa ngayo ngisho kubokhokho betfu. Njengobe ubeka nje, sengivile mine, ngimdzala nangingaka. Mane kuncane nje lengifuna kukubuta Mntungwa, uyihlo yena bese umatisile yini ngalenzaba?'

5

'Cha, bengineke ngilokotse ngingamtjeli ngobe ngumuti wakhe lona lesikuwo. Utsite utawuletfwa ngumnaketu lomkhulu,' atsi nahlala phasi kuphendvule Kunene lowakhuluma ahleti phasi.

'Baketfu nami ngitsandza kudvumisa lelijaha kulendlela lelihambe ngayo. Futsi ngiyamsekela kakhulu ngobe nakunentfo lenje ekhaya kungete kwaba khona kuthula kungakevakali kahle kutsi lomuntfu lomubi ngubani.' Kuthule kutsi cwaka, kuvakale kuphefumula kuphela. Lushawulo atsi uphakamisa emehlo ahlangeane newaTintfombi lowavele wawehlisa masinyane akhe. Ngaleso sikhatsi nguloyo abelwa nemicabango ngalokutakwenteka ngelilanga lelilandzelako. Tintfombi yena kwakutsi akabhamuke nje kutfukutsela noko watibamba ngobe esaba umyeni wakhe futsi angafuni kutsela bakubo ngelihlazo.

10

15

Batsi sebasendlini nadzadzewabo wavele walimisa ngesihloko kwekutsi yena akalubhadzi lapho kutsiwa kuyiwa khona. 'Hhawu! Tintfombi manyala mani lawa lowakhulumako? Sewusho kutsi wena noma unгахambisani nalomcondvo sewungehluka wedvwa ungatsi nguwe lomtsakatsi, kahle wena kutenta luhlanya.' 20

'Cha dzadze, ungangitsatsi kabi, mine kutsi nje lentfo angiyitsandzi ngobe iletsa emagcubu nekucabana ekhaya. Nitsi nihleti nibe nibukana bukluluklulu. Mine nje kube ngiyatentela ngabe ...'

'Kantsi unatse tjwala buni wena? Yini ukhulume ungatsi kukhona lokwatiko ngalokufa kwalabantfwana? Nangabe sewatsenga butsi utatibonela.' 'Mine phe ...' 25

'Angisafuni mlonyana wakho wena ngiyekele ngitibeke phasi khona ngitewusheshe ngivuke.'

Walala afutselana Tintfombi kungekho lapho angaphefumula khona ngobe nadzadzewabo nangu abesavuke indlobane.

Ngakusasa bavuswa nguyise waLushawulo asefika ngemoto yendvodzana yakhe njengekusho kwakhe. Noma bebangakalali bonkhe, kodvwa bavuka bonkhe. Kwaba kwesula emehlo nje bavele bagcwala indlela. 30

Bonkhe bahambela etulu bajake kuyawuva kutsi umtsakatsi ngubani. Ngulowo abetisolala lamsolako nome lowo lake weva kutsi akalungi kahle. Imphela basuka bacinisile nabatsi inhletiyo ayilali namuntfu. Iba iloku ibalisa nje nanome kungasiti lutfo. Kwakunjalo-ke nakulabo labebashuca kuleyo ndlela babange kaMagwazimbuti labenguyena aphetse tangoma letishaya umhlahlo. Phela tatatiwa vele kutsi atishayi nani phasi. Nabo-ke batsi befike tavele takhwela etikwabo tabagudzagudza tagcina tiphume ngaye Tintfombi letamnuka tamhhula tamfaka sikontiyela enhloko. Phela nase wentiwe njalo ubonwa nangubani kutsi tikushaye emkhayeni. 35 40

Setiwucedzile umsebenti wato tangoma Lushawulo wevakala asabita lahamba nabo.

'BoKhumalo nani boMagagula, asambeni. Akusekho lesisakulindzele.' Washo kwakhanya nakunoma ngubani kutsi akasenamsebenti nentfo letsi Maseko.

'Heyi laze lagezeka ligama lamake naloku asatifela kadzeni nje,' kusho Lobelungu.

[Likhasi 104–106]

- 7.1 Chaza simonhlalo lesivetwe kuletheksthi lengenhla. (2)
- 7.2 Ngukuphi lokungemasiko lokulandzelwe nguLushawulo uma kuyewukhulunywa tindzaba temuti wakaKhumalo? (2)
- 7.3 Chaza kutsi yini lengenta bahluti bemanoveli batsi Lushawulo ungumlingsi loyindilinga uma ufundza letheksthi lengenhla nenoveli yonkhe. (2)
- 7.4 Nguwuphi umoya lokhona kuletheksthi lengenhla? Sekela imphendvulo yakho. (2)

- 7.5 Ngukuphi lokwenteka kuletheksthi lokuveta kutsi Tintfombi ungumuntu lonemfihlo? (2)
- 7.6 Kungani kutsiwe letheksthi lengenhla iluvutfondzaba? Chaza. (2)
- 7.7 Ngusiphi sigameko lesikuletheksthi lesiveta kutsi labantfu balendzawo bakholelwa kulabaphasi? (2)
- 7.8 Ngekubona kwakho letheksthi iyahambisana yini nesihloko salenoveli yonkhe? Sekela imphendvulo yakho. (2)
- 7.9 Ucabanga kutsi wenta sincumo lesihle yini Lushawulo ngekuya emkhayeni? Sekela imphendvulo yakho. (2)
- 7.10 Ungasho yini kutsi abekuhlelile Tintfombi kubulala bantfwana bakaKhumalo? Chaza. (2)
- 7.11 Umbhali utitjelani tetsamelilwati ngekwetsa Tintfombi lelibito? Chaza. (2)
- 7.12 Kube bewungumtali waLushawulo bewungamsita njani emva kwekuvela kwekutsi Tintfombi nguye lotsakatsa bantfwana bakaKhumalo? Bhala emaphuzu LAMATSATFU. (3)
- [25]**

UMBUTO 8: UMBUTO LOYINDZABAMBHALO**KUBAMBA LETINGELAKO – DE Nkosi**

Mphikeleli kumfanela ngayiphi indlela kuba ngumlingisi logcamile kulenovel? Bhala indzabambhalo leveta tigateko letiphendvula lombuto ulandzele letihlokwana:

- Tinkinga labukene nato Mphikeleli ngalesikhatsi afuna kufundza.
- Tigameko letitsintsa Mphikeleli nebakaTsabetse.
- Tigameko letitsintsa Mphikeleli emmangweni.
- Kuphumelela kwaMphikeleli etifisweni takhe.

Budze bendzabambhalo yakho abube ngemagama la-340 kuya kula-390.

[25]**UMBUTO 9: IMIBUTO LEMIFISHA****KUBAMBA LETINGELAKO – DE Nkosi**

Fundza lethekesthi leyincenye yendzaba lesenovelini bese uphendvula imibuto lelandzelako.

ITHEKSTHI B

'Ngikubone kukuhle futsi kufanele kutsi ngikuvakashela babe Tsabetse lapha ekhaya kakho,' kusho Mphikeleli akhuluma angekhatsi emabaleni akaTsabetse. Pho, akacali kubeka lunyawo lwakhe kulelikhaya, wase wefika ngesikhatsi afuna indzawo yekuhlala.

'**Siyabonana ndvodzana. Sibusiso lesikhulu kuvakashelwa nguwe.** Emagalelo 5 akho emisebentini yemmango avakele ndvodzana. Ungumholi sibili. Kuyakhombisa kutsi boMncina bawenta ngemphele umsebenti wabo. Bawenta ngekutimisela nangendlela lefanele,' kusho Tsabetse. Pho, sewatsatsa umhlalaphasi kuyo yonkhe imisebenti yesive.

'Kadze ngifisa kulitfolo litfuba lekukhuluma nawe tindzaba letitsintsa tsine ndvodzana. 10 Ngikuletselwe nguNkulunkulu njengobe ulapha embikwami,' kusho likhehla lelinguTsabetse likhuphula tibuko talo letiwako. Bakhuluma basendlini yekuphumula ekhaya kaTsabetse. Bahleti bobabili.

'Embikwekutsi sikhulume lokunyenti ndvodzana, ngicela ungilindze kancane ngisayolandza lipotimende lami leliphetse tonkhe tincwadzi tami letibalulekile,' kusho 15 Tsabetse, asukume ahambe aye ekamelweni lakhe atsatse lipotimende lakhe abuye nalo. Akhiphe sikhiya alivule, bese ukhipha tincwadzi letimbili lesetiphaphatsekile atinikete Mphikeleli atsi akatifundze. Incwadzi yekucala ibhalwe kutsi, 'Bangive Velakhe Zwane, wangcwatjwa nguhulumende emgodzini C20007, emalibeni aseMzinoni ngemhlaka 10 Ingci ... Wafela etandleni tebemtsetfo ngemhlaka 5 Ingci ... 20 Incwadzi yesibili Lotive Lomawa Zwane, wangcwatjwa emgodzini E202020 emalibeni aseMbalenhle ngemhlaka 10 kuMabasa.' Watifundza Mphikeleli tehla tinyembeti. 'Ngitele lokunye, ngitfolo lokunye,' kusho Mphikeleli.

Lokwadvudvuta umoya wakhe kwati kutsi emaliba ebatali bakhe akuphi. Washo nekutsi utawulungisa kahle, awakhe abe sikhumbuto emphilweni yakhe. Watibukisisa kanyeti tincwadzi lanikwe tona nguTsabetse. Washo waphimisela watsi, 'Umntfwana wemfana lengiyomtfola ngiyomcamba ngeligama lababe lelitsi, Bangive noma Velakhe. Uma kuyintfombatane ngitamcamba lelitsi, Lotive noma Lomawa. Uma ngibuka bona ngitawube ngibona batali bami, labangiletsa kulomhlaba.'

25

Amange atihluphe ngekubuta Mphikeleli kutsi tincwadzi leti tefika njani etandleni telikhehla Tsabetse, kepha weneliswa kutfolalwati ngebatali bakhe. Loko kwamenta kutsi alubhale phasi lusuku latfolalwati ngalo letincwadzi, washo nekutsi lungumlandvo emphilweni yakhe. Tsabetse wachubeka nenkhulumo yakhe watsi, 'Ungicilele ndvodzana. Ngiwusebentele ngekwetsembeka umbuso wembalandlati.'

30

'Bekusikhatsi sembalandlati leso babe. Nawe bewenta lokwentiwako ngaleso sikhatsi. Alikho licala lengikwetfwesa lona Sihlasi. Kuko konkhe lokwenteka emkhatsini wetfu, ngiyakucolela. Kunyenti lengikufundzile kuwe lokungenta ngite lapha. Kuwe ngifundzile kutsi kubobanjelelwa emigomeni nasetincumeni letibekiwe. Kuwe ngifundzile kutsi liciniso alibitwa ngalelinye ligama ngaphandle kwekutsi liciniso, nemanga akabitwa ngalelinye ligama ngaphandle kwekutsi emanga.'

35

40

'Kunyenti lokuhle lesakumunya ngendlela lefanele, kantsi kunyenti lokuhlaneketelwe lesakumunya sakumunyisisa lesekungenta ngicolise ebantfwani lamuhla. Sibatsengisile bantfu labangenacala. Siyifafatile imfundzisolite singaboni,' kusho Tsabetse.

Inkhulumo yaMphikeleli yatsatsa emahora lamabili. Tsabetse watsi, 'Ngikhululekile lamuhla.'

45

Inkhulumo yaMphikeleli abete ngayo yekutewucobelela lwati ngekusebenta kwemakomiti etitaladi newetigodzi esikhatsini sakadzeni, amange asakwati kutsi bakhulume kabanti ngaloko. Babonisana nje ngetinkinga letincane letigcina titinkhulu uma kungekho tinhlaka letikhona futsi letimiswe ngendlela lefanele emmangweni. Tsabetse watsi, 'Akusiwo onkhe emacala lekumele aye enkantolo. Emacala lafana nenhlebo, kuhlambalata, kucabanisa, kusongelana nalamanye adzinga tinhlaka temmango. Ngiko nje emakhotho etfu ahlala agcwele ngobe adzingidza emacala lekumele ngabe adzingidvwa tinhlaka temmango.'

50

[Likhasi 102–104]

- 9.1 Lenkhulumo legcanyisiwe endzimeni yesibili kuletheksthi lengenhla iveta siphimo simo semoya? Chaza. (2)
- 9.2 Caphuna inkhulumo leveta inkholo yaSikhulu Tsabetse kuletheksthi lengenhla. (2)
- 9.3 Chaza kutsi yini lengenta bahluti bemanoveli batsi Sikhulu ungumlingsi loyindilinga kusukela esingenisweni salenoveli ute ufike kuletheksthi lengenhla. (2)
- 9.4 Ngukuphi lokwenteka kuletheksthi lokuveta kutsi Sikhulu Tsabetse ungumntfu labenemfihlo? (2)

- 9.5 Catsanisa lokugcinwa kwetincwadzi letinemininingwane lebalulekile epotimendeni nendlela letigcinwa ngayo kulesikhatsi sanyalo. (2)
- 9.6 Kungani kutsiwe letheksthi lengenhla iyincenye yeluvutfondzaba? Chaza. (2)
- 9.7 Ucabanga kutsi kutfolo kwaMphikeleli tincwadzi tebatali bakhe kwaba naliphi ligalelo emphilweni yakhe? (2)
- 9.8 Ngekubona kwakho sihloko salenovelisi siyahambisana yini nendzaba yonkhe? Chaza. (2)
- 9.9 Saba sihle yini sincumo saMphikeleli sekuyewuvakashela sikhulu Tsabetse? Sekela imphendvulo yakho. (2)
- 9.10 Ngekubona kwakho abekuhlelile yini Sikhulu Tsabetse kuphatsa Mphikeleli kabi? Sekela imphendvulo yakho. (2)
- 9.11 Umbhali umetse kahle libito babe waMphikeleli 'Bangive'. Sekela lesitatimende. (2)
- 9.12 Kube bewulilunga lemmango bewungamgugcutela njani Mphikeleli ngalesikhatsi ahlukunyetwa bakaTsabetse? Bhala emaphuzu LAMATSATFU. (3)
- [25]**

UMBUTO 10: UMBUTO LOYINDZABAMBHALO**TIBOPHO TELUTSANDVO – JJ Thwala**

Mlungisi kumfanela ngayiphi indlela kuba ngumlingisi logcamile kulenovel? Bhala indzabambhalo uvete tigameko letiphendvula lombuto ulandzele letihlokwana:

- Tinkinga labukene nato Mlungisi emndenini.
- Tigameko letitsintsa Mlungisi naLomusa.
- Tigameko letitsintsa Mlungisi nebangani bakhe.
- Kwehluleka kwaMlungisi etifisweni takhe.

Budze bendzabambhalo yakho abube ngemagama la-340 kuya kula-390.

[25]**UMBUTO 11: IMIBUTO LEMIFISHA****TIBOPHO TELUTSANDVO – JJ Thwala**

Fundza lethekesthi leyincenye yendzaba lesenovelini bese uphendvula imibuto lelandzelako.

ITHEKSTHI C

LaNdlovu abelibona likhaya livuka lima. Sinyatselo saMlungisi besisho kufezeka kwetinhloso taLaNdlovu nemyeni wakhe.

Lokunye lokwabenta bajabula kutsi umndeni wakaboLomusa ucele kutokwentiwa wonkhe umsebenti ekhaya lamalume wakhe lelikhona lapha **eNgodini**. Loko kwabenta kutsi bajabulele kuncipha kwetindleko.

5

'Yonkhe intfo seyihlangene make.'

'Liciniso lelo ndvodzana, asisekho sitsiyo endleleni yetfu. Indlela yetfu ivutsiwe nyalo.'

'Sekungaba tinkinga lapha nalapha ngobe tihlala tikhona emphilweni.'

'Uma umsebenti wentiwe kahle akukho lokutawuma endleleni yetfu.'

'Lokubalulekile emphilweni kuhlala kahle tintfo tilandzele umgudvu lofanele ndvodzana.'

10

'Akukho lokwedlula kubambisana kusukela ekucaleni kuye kufinyelelwe ekugcineni.'

'Imphumelelo ingumphumela wekuhlala kahle tintfo, wekubambisana nekusebenta ngebucotfo nangekwetsembeka. Siye sibone bantfu sebaphumelele emphilweni uve kutsiwa banenhlanhla babuye basho nalokunyenti labacabangela kutsi kube yimbangela yemphumelelo. Liciniso leliphelile nje kwenta tintfo ngendlela lefanele.'

15

'Ngibonga kutinikela kwakho make ekuphumeleliseni imitamo yonkhe.'

Imphumelelo yakho, yimphumelelo yami. Imphumelelo yami, imphumelelo yakho. Ekugcineni kwakhona kuba yimphumelelo yeMakhabako onkhe,' kusho LaNdlovu akhombisa intfokoto sengatsi sebancobile. Wachubeka watsi, 'Ngekubambisana nekutimisela siyowuwela uMgwenya ugcwele! Ngekusebentisana simunye siyolucanca Lubombo sifinyelele esicongweni salo.'

20

Kwahanjwa kwayiwa kamalume waLomusa lapho kwefika kwentiwa konkhe lokufanele. Malume waMlungisi wala waphetsa kuya watsi yena akatihlanganisi nentfo langayitfolisisi simo sayo. Wakhipha nemavi latsi lentfo leyentiwa ngumshana wakhe yinyoka lengenanhloko nemsila. Wabuye wayitolika yena watsi yindzaba lengenasingenisano nesiphetfo. Wawakhipha emavi avakala latsi yena akasondzelani nentfo lenjalo.

25

Kwedlula sikhatsi malume waMlungisi angafiki. Kwabonakala kutsi bakhongi basale sebahamba noma angekho. Mlungisi watfola emajaha lamabili labekatomsita kulomcimbi. Kwatsi kusentiwe emalungiselelo ekuya kaboLomusa, wavakala Lomusa atsi yena akayi lapho. Kwasale sekuvunyelwana ngekutsi batali labakhulise Lomusa batawufika khona lapha endlini yaLomusa noma kutawusetjentiswa likhaya lakabomngani wakhe. 30

Akekho lobekati kutsi Lomusa bekalelani kutsi ayolotjolwa kubo. Akukho sizatfu lesivakalako lobekasibeka Lomusa, bekasolo atsi nje ngeke kulunge. 35

Kutse uma sekwentiwe onkhe emalungiselelo kwavunyelwana ngekutsi bakhongi sebayovuka ekuseni bashone khona. NaMlungisi watsi uma ababuka wabetsemba. Ngentsatsakusa avuswe emajaha lebekatfunyelwe nguMlungisi. Naye Mlungisi wajabula uma abona kutimisela kwalabafokati. 'Senifikile madvodza?' Avume emajaha. 40

Avuse unina Mlungisi, amkhombise lamajaha lawo. Bashone endlini lenkhulu. Kukhishwe imali lebatawuhamba nayo. Yedlule etinkhulungwaneni letitsite. Ibekwe phasi.

Kushiswe imphepho, akhulume nemadloti unina waMlungisi kucedvwe aphume emajaha ahambe. Asale acabanga Mlungisi angati kutsi bakhaboLomusa batawufika batsini ngalenzaba yakhe yekufuna kushada Lomusa. Litsemba lonkhe laMlungisi libe kuLomusa, ngoba kutsiwa litsemba alibulali. 45

[Emakhasi 85–87]

- 11.1 Leligama leligcanyisiwe kuletheksthi libaluleke ngani kusibekandzaba salenoveli? (2)
- 11.2 Ngukuphi lokungemasiko lokumele kulandzelwe uma kuyewulotjolwa langakakulandzeli Mlungisi. Bhala KUBILI. (2)
- 11.3 Chaza kutsi yini lengenta bahluti bemanoveli batsi LaNdlovu ungumlingsi loyindilinga kusukela esingenisweni salenoveli ute ufike kuletheksthi lengenhla. (2)
- 11.4 Lomoya wenjabulo lokuletheksthi wagucuka waba njani eluvutfondzabeni lwalenoveli? Sekela imphendvulo yakho. (2)
- 11.5 Ngukuphi lokwenteka kuletheksthi lokuveta kutsi Lomusa ungumuntfu lonemfihlo? (2)
- 11.6 Letheksthi ikuholela kusiphi sigaba sesakhiwo senoveli? Usho ngani? (2)
- 11.7 Lokushiswa kwemphepho ngembi kwekuyewulobola Lomusa, kwabasita yini bakaboMlungisi? Chaza. (2)
- 11.8 Ngekubona kwakho sihloko salenoveli siyahambisana yini nendzaba yonkhe? Chaza. (2)
- 11.9 Sincumo lesatsatfwa ngumalume waMlungisi sekungayi kuyewumlobolela sikufundzisani uma ubuka siphetho salenoveli? (2)

- 11.10 Ungasho yini kutsi kulotjolwa kwaLomusa bekubugebengu lobuhleliwe? Bhala KUBILI. (2)
- 11.11 Umbhali wehlulekile kusebentisa lisu lekwetsa umlingisi longuLomusa libito. Fakazela lesitatimende ngalokwenteka enovelini. (2)
- 11.12 Kube bewungumtali waMlungisi bewungamsita njani emva kwekuboshwa kwaLomusa, ahlazeke emmangweni. Nika emaphuzu LAMATSATFU. (3)
- [25]**

NOBE

TEMZABU

Phendvula umbuto ube MUNYE kulena yetemdzabu lemisiwe.

UMBUTO 12: UMBUTO LOYINDZABAMBHALO**SILULU SEMASWATI – NC Mthethwa**

Tibongo netinganekwane kuye kuvete buchawe nekuba nesibindzi lesesabekako. Bhala indzabambhalo ngalenganekwane letsi 'Libhubesi naLogwaja' kanye netibongo teNgwenyama Mswati II kufakazela lesitatimende usebentise naletinkhulumobuciko letilandzelako:

Inkhulumobuciko:**TAGA**

- Wadla sibindzi sengwenya: Lokusho kutsi unesibindzi lesibi.
- Akabhenywa akasiyo insangu: Akudlalelwa kuloyo muntfu.
- Lokwentiwa ngulogwaja lokuveta buchawe nesibindzi.
- Lokwentiwa ngulogwaja lokuveta kutsi akabhenywa akasiyo insangu.
- Lokwentiwa yiNgwenyama Mswati II lokuveta buchawe nesibindzi.

Indzabambhalo yakho ayibe ngemagama la-340 kuya kula-390.

TIBONGO TENGWENYAMA MSWATI II

- 1 Mswati lomnyama kulabalutfuli,
- 2 Mgobo kaMphondv' awungen' esigujini,
- 3 Ungen' emagabelwen' etinyatsi.
- 4 Wats' atihlaba watifak' umgobo,
- 5 Wats' **atidla watidla** kaMabhoko.
- 6 Imamba leluhlata leyavuka
- 7 Etihosheni taseLubhalule.
- 8 Umshiseli chu!
- 9 Washisela tikolo taba timbili,
- 10 Ngekushisela kusaNdlela naMneli.
- 11 Inkhosi legwaze bantfu yadzimate yadzinwa,
- 12 Yaze yabatfumba njengetinkhomo.
- 13 Uhlasele ngensongo kuMtjekeni,
- 14 Tigijima ngaseNshonalanga.
- 15 Niyewubikela Mphandze kaZulu.
- 16 Kutsi nay' indlov' idla leny' indlovu,
- 17 Ayiyidl' iyeleka ngemahiya nangemahlukuto.
- 18 Inkhosi yakitsi lehlabanako,
- 19 Ngingamange sengiyibon' inkhos' ihlabana.
- 20 Vuso lelidl' umuntf' asesiswini,
- 21 Longephandl' asindze ngematubane kutibalekela.
- 22 Wena nyoni kamabitw' as abele.

[Likhasi 102]

[25]

UMBUTO 13: IMIBUTO LEMIFISHA**SILULU SEMASWATI – NC Mthethwa**

Fundza lethekesthi leyincenye yengane kwane bese uphendvula imibuto lelandzelako.

ITHEKSTHI D**INDVODZA LEYANIKWA LIDADA**

Kadzeni ngesikhatsi sekufika kwebadzeshi kulelive leMaswati, bekukhona umfati anemntfwana munye wemfana. Uyise walomfana bekukadze afa.

Lomfelokati nendvodzana yakhe bebaphila imphilo lelukhuni, bahlupheka. Bebalamba, baswele tingubo tekwebatsa. Ngesikhatsi sasebusika bebacucudvwa ngemakhata, basitwe kulala ngasemlilweni kuze kuse. 5

Lomfana wakhula, watsi nasesigabeni sekukhuhluka wahamba wayewufuna umsebenti kulomunye webadzeshi lobekanelipulasi afuyile futsi. Wamcasha umdzeshi wasebenta umfana.

Lomdzeshi lona abengamholeli kahle umfana. Abemnika imadlana bese umnika kudla amembulele netimphahla, letinye tibe takhe letinye tibe tenina. Nobe abesebenta kamatima nje, wabeketela wachubeka nekusebenta waze waba yindvodza, wacatsatela netimvu solo tigaya ngamhlatsi munye. 10

Ngalelinye lilanga umdzeshi wambita wakhuluma naye. 'Ngifuna kukwatisa kutsi kulenyanga letako ngiyahamba nemndeneni wami sibuyela kulakitsi ngesheya kwelwandle.' 'Kusho kutsi kutawuba kuphela kwemsebenti wami ngaleyo ndlela?' 15

Nembala sefika sikhatsi umdzeshi watsengisa konkhe labenako washiya lidada linye. Watsatsa lelidada walinika lesisebenti sakhe. 'Ngikunika nali lidada uliphatse kahle. Ulondle ngemfanelo ulinatsise nemanti, ungacali ulihlabhe.'

'Kulokusebenta kwami lokumatima emashumishumi eminyaka ngihola imadlana, ngifanelwe kutfolo lidada kuphela! Iphelile yini imali?' Wahleka umdzeshi wanikina inhloko. 20

'Imali angeke ikwentele lufu. Wena tsatsa lidada uyewulifuya, wente lengikutjele kona nje kuphela.' 'Ngilondle ngani?' 'Ngikubekele lisaka lemmbila. Lommbila ningawudli ngobe walelidada.'

Indvodza yalitsatsa lidada nobe beyisisimba nje. Bavalelisana nemdzeshi, yatjatsa lisaka yagodla lidada layo yashona kunina ekhaya. Yefika yayetfula indzaba kunina. Wamangala kodvwa wamyala umntfwanakhe kutsi ente njengobe ayaliwe. 25

Lidada lahlala emalanga lamabili kulesitsatfu latalela licandza legolide. Yalitsatsa licandza indvodza yayawulitsengisa yatfolo imali lenyenti. Batsenga timphahla nekudla. Laphindza lidada latalela lelinye licandza legolide, latsengiswa kwatfolakala lenye imali lenyenti bakha ngayo indlu lenkhulu bayigcwalisa ngefenisha. Lachubeka lidada nemsebenti walo, yangena imali. Salukati nemntfwana banjinga. 30

Ngalelinye lilanga lendvodza yalibamba lidada yalibulala ifuna kukhipha lamacandza lecabanga kutsi agcwele esiswini kepha ayizange yatfolo lufu. Yagcina ngalelo langa kutsengisa igolide. Imali beyikhona yaphela kancane kancane. Nemphahla yaguga 35 kancane. Indlu nayo yadzilika, sigcino kwabhoka buphuya.

[Likhasi 79–81]

- 13.1 Caphuna tintfo LETIMBILI letivetwe ekucaleni kwaletheksthi letiveta kutsi simo besimatima kulendvodza leyanikwa lidada. (2)
- 13.2 Nika tizatfu LETIMBILI letenta kutsiwe lomdzeshi abenebuntfu. (2)
- 13.3 Saba njani simo semoya kulendvodza ngalesikhatsi lelidada licala kutalela emacandza egolide? Chaza (2)
- 13.4 Hlobo luni lweludvweshu lolukhona kulenganekwane? (2)
- 13.5 Uyavelana yini nalendvodza kuloku lokwayehlela ngekubulala lidada? (2)
- 13.6 Yini lekuletheksthi leveta bunganekwane? Chaza. (2)
- 13.7 Sikufundzisani siphetfo salendvodza lokukhulunywa ngayo kulenganekwane? (3)

NA

Fundza letibongo bese uphendvula imibuto lelandzelako.

TIBONGO: MADIBA

- 1 Ngitibonile tinconcodzi,
- 2 Tikwetfulel' ingadzibe
- 3 Bomongameli bemav'emhlaba,
- 4 Bats' uwucophil' umlandvo,
- 5 Ngekubuyis' I-Afrika lesentasi,
- 6 Ngemlom' etafuleni wancoba,
- 7 Wavimbel' ingati lebovu.
- 8 Tilishumi kuNkhwenkhweti,
- 9 Emnyakeni wanga-1994
- 10 Waniketw' emandl' ekubusa,
- 11 Sengatsi **ngiyakubon'** ugiya,
- 12 Sengatsi **ngiyakubon'** umoyitela,
- 13 Inkhululeko kuphela kulabamphisholo,
- 14 Inkhululeko kuphela kubadzeshi.
- 15 Washiya bukhosi bakho eTranskei,
- 16 Watsi 'ngingum-Afrika!
- 17 Wakhetsa kuyewulw' esilungwini.
- 18 Ungamlibali Sabata,
- 19 Ngekukuyis' enyonini,
- 20 Udzimat' unatse naseFort Hare,
- 21 Ngob' uyihl' asakhotsama.
- 22 Bewungasilo nakancane livaka.

[Likhasi 115–116]

- 13.8 Bhala luhlobo lwemvumelwano lolwakhiwa ngumugca we-5 newe-6? (2)
- 13.9 Bunkondlo buni lobakhiwa ngulamagama labhalwe acindzetelwa kuletibongo? Chaza. (2)
- 13.10 Caphuna umugca lokuletibongo loveta kutsi Madiba abengasilo ligwala. (2)
- 13.11 Bhala umcondvo lofihlakele wemugca we-19 newe-20. (2)
- 13.12 Siyajabula yini sive ngaloko lokwentiwe nguMadiba? Sekela imphendvulo yakho. (2)
- [25]**

SAMBA SESIGABA B: 25

SIGABA C: UMDLALO

Kulesigaba kunemidlalo LEMIBILI. Wena-ke khetsa ube MUNYE lowufundze lonyaka uphendvule ngawo.

CAPHELA: Khetsa emkhatsini WENDZABAMBHALO NEMIBUTO LEMIFISHA kulowo mdlalo lowufundzile. Nangabe ukhetse kuphendvula umbuto loyindzabambhalo enovelini, uphokelelekile kutsi kulesigaba uphendvule imibuto lemifisha. Nangabe ukhetse kuphendvula imibuto lemifisha enovelini, uphokelelekile kutsi kulesigaba uphendvule umbuto loyindzabambhalo.

UMBUTO 14: UMBUTO LOYINDZABAMBHALO**KUTAWUBA NJALO – SZ Simelane**

Inhloso yembhali kuye kube kwedlulisa tifundvo letitsite kutetsamelilwati. Bhala indzabambhalo ucoce ngetigameko letesekela letifundvo letilandzelako letitfolakala kulomdlalo.

- Kuba nebangani labacotfo kuyaphumelelisa emphilweni.
- Tinkinga atingemi endleleni yemphumelelo.
- Kubi kutsi batali bangabeluleki bantfwana ngetindzaba telutsandvo.

Budze bendzabambhalo yakho abube ngemagama la-340 kuya kula-390.

[25]**UMBUTO 15: IMIBUTO LEMIFISHA****KUTAWUBA NJALO – SZ Simelane**

Fundza lethekesthi leyincenye yemdlalo bese uphendvula imibuto lelandzelako.

ITHEKSTHI E

(Lapha kusekhaya kaMagagula, Ncobile ucoca nenina LaHleta, bahleti esibuyeni)

LAHLETA:	(Anyonkholota Ncobile) Uyabona Ncobile, mine lo (Atishaya sifuba) angeke ngishayelwe nguwe umtsetfo wekutsi ngenteni. Angiva kahle, utsi ngenteni?	
NCOBILE:	<i>(Ambukile)</i> Mine make bengitsi ...	5
LAHLETA:	<i>(Amngena emlonyeni)</i> Bewutsini? Nhhi, bewutsini? Uyati nangikubuka ngitiva ngatsi lilanga lengakuletsa ngalo lapha emhlabeni lalicalekisiwe. Bonkhe bantfu balapha Kamatsamo bakhombana ngami bangihleke ngendzaba yakho ntfombatana, kuloku utsi mine lo ngijabuleleni ngabola ematfumbu nje? Hhayi hhayi hhayi!	10
NCOBILE:	Uyati ye make lokubi akuphindziselwa ngalokubi futsi <i>(ambuke)</i> mine ngifuna sihlale phasi sikhulume, hhayi kulwa Dleman.	
LAHLETA:	<i>(Aphefumulela etulu)</i> Utsini? Ufuna nobe ucela? Yibeke kahle inkhulumo yakho ivakale ingamane ibhimbe nje ntfombatana, uyangiva?	15

NCOBILE:	(<i>Atenwaya</i>) Yehlisa umoya tsine Mntimandze, yehlisa umoya.	
LAHLETA:	(<i>Ambuka kabi</i>) Leni? Mhh leni? Udlalile ngami mntfwanyana wangifaka esilikisini, ngabukelwa bantfu bonkhe. Yini yona lena lengaka lotsi ufuna siyikhulume? Angitsi tolo loku wena bewute sikhatsi sekukhulumisana nami, umoya sewuhhusha ngalenywe indlela nyalo tobhi, nami-ke sengite sikhatsi sekukhuluma nawe. Khuluma ngive.	20
NCOBILE:	(<i>Ngelivi leliphasi</i>) Ngicela ungibuyisele esikolweni tsine make.	
LAHLETA:	(<i>Ashaya tandla</i>) Hhawu! Niyangivisa yini boMtimandze! (<i>Ambuke</i>) Kantsi esikolweni kufundza bobani? Kufundza bafati bemiti? Asungitjele. Kufundza bomake Mnisi naboLaMagagula? Nhhi?	25
NCOBILE:	Make ngicela ungibuyisele esikolweni tsine Mntimandze.	
LAHLETA:	(<i>Aphakamisa livi</i>) Ngikubute kwekutsi kufundza bobani esikolweni? Bafati kufanele baye emendvweni tobhi, sikutjele tsine botsine. Hamba uyekubhalisa esikolweni salabadzala, angitsi sikhona lapha! Natsi sabukabuka khona sikhanyisa ngesiphefu. Khona-ke tobhi. (<i>Akhomba le</i>)	30
NCOBILE:	(<i>Abuke phasi</i>) Ngiyacolisa kuko konkhe lengakwenta kuwe Dlemane. Konkhe loku akusho kutsi angisasuye umntfwanakho Dlemane.	35
LAHLETA:	Ufuna kulandzani esikolweni ye Ncobile?	
NCOBILE:	(<i>Ambuka</i>) Imfundvo Mntimandze.	
LAHLETA:	(<i>Amnyonkholota</i>) Ini? Imfundvo nobe umntfwana? Nobe kokubili?	
NCOBILE:	(<i>Ngelivi lelincengako</i>) Hhawu Bhambolunye, umntfwana sewungena njani kulesicelo sami? Emaphutsa lengiwentile asangihlakaniphisile make, angiboni kutsi ngingaphindze ngikhalakatsele kulowo mgodzi futsi.	40
LAMAGAGULA:	Umntfwana-ke? Utsi utawumbekaphi? Utawumyisa kaMnisi? Hhe?	
NCOBILE:	(<i>Ashaya umchino kancane</i>) Cha kute umntfwana lotakuya kaMnisi make. Ngicela kutsi naye ungibhasobhele yena Dlemane. Njengobe sengike ngasho, emaphutsa ayitolo angente ngabe sihlakaniphi sakusasa Mntimandze. (<i>Amntjontje</i>)	45
LAMAGAGULA:	Hhawu! Hha-wu! Hhawu! Nangu Ncobile angihlolela bo! Mine bengitsi ucela sandla, kantsi ufuna umkhono wonkhe! Kahle kungitjela insambatseka wena lilanga libalele. (<i>Ambuke</i>) Asusho Ncobile, kona lokwelihuzu kwatsi nakucedza kukucosha kona kwase kushona kuphi? (<i>Abuke luswane anikine inhloko</i>) Mine-ke ntfombi kwangisita ngobe bengivele ngikwenyanya. (<i>Abuke luswane futsi</i>)	50
NCOBILE:	(<i>Ngelekuncenga</i>) Hheyi Mntimandze angati kutsi usho bani nawutsi ulihuzu ngobe mine angatani nemahuzu.	55

[Likhasi 169–171]

- 15.1 Lenkhulumo legcanyisiwe ekucaleni kwaletheksthi lengenhla iveta LaHleta ungumuntfu lonjani? (2)
- 15.2 Letingcoco taNcobile naLaHleta letikuletheksthi lengenhla tiveta luphi luhlobo lweludvweshu? Usho ngani? (2)

- 15.3 Liphimbo laLaHleta lehluke ngani kunelaNcobile kuletheksthi lengenhla? Chaza. (2)
- 15.4 Yini lengenta bafundzi baheheke emva kwekufudza letheksthi lengenhla? (2)
- 15.5 Ngukuphi lokungenta letheksthi idlaleke njengemdlalo wemoya longadlalwa emsakatweni? (2)
- 15.6 Indlela Ncobile latiphatsa ngayo kulomdlalo yehlukile yini kulolusha lwalamuhla? Chaza. (2)
- 15.7 Letheksthi iyitfutukisa ngayiphi indlela ingcikitsi yalomdlalo? (2)
- 15.8 Kubangelwa yini kutsi kutsiwe lomdlalo usenamisi? Nika KUBILI. (2)
- 15.9 Lenkhulumo yaLaHleta '**Hamba uyekubhalisa esikolweni salabadzala, angitsi sikhona lapha! Natsi sabukabuka khona sikhanyisa ngesiphefu**', ingaba naliphi ligalelo emmangweni lesiphila kuyo? (2)
- 15.10 Umlandzi walomdlalo lotsi *Kutawuba Njalo* ungumlandzi longusatikonkhe. Vumela nobe uphikise lombono. (2)
- 15.11 Yini lekujabulisako ngemdlali longuLaMagagula kulomdlalo wonkhe? Bhala KUBILI. (2)
- 15.12 Bhala tigameko letitsintsa Hleta letibufakazi bekutsi abenemona futsi avimba labanye ngenhloso yekutsi bangaphumeleli emphilweni kungako aphetse kabi. (3)
- [25]**

UMBUTO 16: UMBUTO LOYINDZABAMHALO**LAMI LISIPHETFO – JJ Thwala**

Inhloso yembhali kuye kube kwedlulisa tifundvo letitsite kutetsamelilwati. Bhala indzabambhalo ucoce ngetigameko letesekela letifundvo letilandzelako letitfolakala kulomdlalo.

- Kukhetsa bantfu lewutawusebentisana nabo ngekwetsembeka.
- Kungahloniphi umholi kungakwenta utitfole usenkingeni.
- Kuhle kucela teluleko nekungatsatsi tintfo ngemawala uma ungumholi.

Budze bemphendvulo yakho abube ngemagama la-340 kuya kula-390.

[25]**UMBUTO 17: IMIBUTO LEMIFISHA****LAMI LISIPHETFO – JJ Thwala**

Fundza letheksthi leyincenye yemdlalo bese uphendvula imibuto lelandzelako.

ITHEKSTHI F

(Somhlolo uhleti netindvuna takhe letimbili: Nsibandze naSikhunyana.)

SOMHLOLO:	Ngiyajabula kuba nani tindvuna tami. Ngifuna sihlolisise indlela lesesiyihambile naleyo lesisalele.	
NSIBANDZE:	Siyatfokota natsi Ngwenyama yesive. Kumele sibuyekete lokusemuva, sibuye sibuke embili.	5
SOMHLOLO:	Yonkhe imphumelelo lengibe nayo ibe khona ngenca yekutinikela kwenu ekusebenteni ngekutimisela. Ngiyabonga kakhulu! Sengatsi nalabaphasi banganipha tinhlanhla nonkhe tindvuna tami. Indlela lesibambisene ngayo ungatsi sitalwa ngumtali munye. Ningebanaketfu. Babe Ndvungunya wangishiya etandleni tenu. Nsibandze: mahle emavi akho Ngwenyama. Sitimisele kuwa sivuka nawe. Lesikwentako nyalo kuyawukuba umlandvo loyawuhlale ukhunjulwa njalo.	10
SIKHUNYANA:	Tsine sisebentela sive Ngwenyama. Sifuna kusibona sidlondlobala kuze sifane naletinye tive. INgwenyama yetfu siyawuyisekela sisebentise onkhe emakhono lesinawo kutsi iphumelele kuphatsa sive saNdvungunya.	15
SOMHLOLO:	Sesitincamulile tinkhalo letindze naletimfisha sakha buhlobo. Noko siphumelele kukwenta loko. Kusele Mabhula lokumele sicabangisise kutsi sitawusondzela njani kuye. Kusele naMahubhulu logucuke wavukainja lebovu.	20
NSIBANDZE:	Babili bantfu lokumele sicondzane nabo ngco. Ngulaba labashiwo yinkhosi. Bayingoti bobabili.	
SIKHUNYANA:	Yekelani kudlala bo! Mahubhulu ucale nini kuba yingoti?	

SOMHLOLO:	Nguwe wedvwana longati ndvuna yami. Uma singasukumi masinyane, umbuso lo utawucembuka kabili. Mahubhulu sewutfole balandzeli bakhe lapha kulelive labangahambisani nenchubo yami yekubusa ngekuthula.	25
NSIBANDZE:	Tsine siyakha, Mahubhulu uyabhidlita. Kumele siphume nesincumo sinye lamuhla kutsi kumele entiweni kuze konkhe kuhambe kahle.	30
SIKHUNYANA:	Nise nahlala phasi naye nambonisa kutsi loku lakwentako kusiletsela titsa?	
SOMHLOLO:	Kuhlalwe phasi naye kanyenti wasehlula. Hheyi, iyakwati kucinisa inhloko leya ndvodza. Ilibeka livakale lekutsi kuyawugcina yona. Konkhe loku lesikwentako kudlala nje.	35
NSIBANDZE:	Ngusiphi sigwebo lenisibona kutsi simfanele, lesitawukwenta nalabanye labefisa kumlandzela bangabe basamlandzela?	
SIKHUNYANA:	Tinyenti tigwebo letingakhishwa ticondzane naMahubhulu, kepha-ke asicale siyewucwaninga kutsi lolukhula lwakhe selumile kangakanani; butsi bakhe sebudliwe bantfu labangaki; umlilo wakhe sewotsiwe linani lelingakanani.	40
SOMHLOLO:	Mahle lawa mavi. Kumele sicale ngakuphi? Sicale kuMabhula nome kuMahubhulu?	
NSIBANDZE:	Asicale kuMahubhulu ngobe yena usedvutane natsi bese sendlulela kuMabhula.	45
SIKHUNYANA:	Asicaleni khashane bese sibuya edvute.	

[Likhasi 56–57]

- 17.1 Lenkhulumo legcanyisiwe ekucaleni kwaletheksthi lengenhla iveta Somhlolo ungumuntfu lonjani? (2)
- 17.2 Catsanisa indlela inkhosi Somhlolo lebusa ngayo kanye nendlela lekubuswa ngayo live leNingizimu Afrika. (2)
- 17.3 Yini leyenta liphimbo lebadlali labakuletheksthi lengenhla libe phasi? (2)
- 17.4 Yini lengenta bafundzi baheheke emva kwekufudza letheksthi lengenhla? (2)
- 17.5 Ngukuphi lokungenta letheksthi idlaleke njengemdlalo wemoya longadlalwa emsakatweni? (2)
- 17.6 Indlela Mahubhulu latiphatsa ngayo kulomdlalo yehlukile yini kuloku lokwenteka kutembusave kulelive leNingizimu Afrika? Sekela imphendvulo yakho. (2)
- 17.7 Letheksthi iyitfutukisa ngayiphi indlela ingcikitsi yalomdlalo? Chaza. (2)
- 17.8 Kubangelwa yini kutsi kutsiwe lomdlalo uyimbangalusizi? Nika KUBILI. (2)
- 17.9 Lenkhulumo yaSikhunyane lecindzetelwe ingaba naliphi ligalelo emmangweni lesiphila kuyo? (2)

- 17.10 Umlandzi walomdlalo lotsi 'Lami Lisiphetfo' ngumlandzi longusatikonkhe. Vumela nobe uphikise lombono. (2)
- 17.11 Yini lekujabulisako ngaSomnjalo unina wenkhosi kulomdlalo wonkhe? Bhala KUBILI. (2)
- 17.12 Bhala tigateko LETINTSATFU letitsintsa Mahubhulu letibufakazi bekutsi abenemona angayifiseli lokuhle inkhosi Somhlolo lokumente waphetsa kabi emphilweni. (3)
[25]

SAMBA SESIGABA C: 25
SAMBA SAKO KONKHE: 80